

quid modo posteriore, dicuntur etiam simpliciter et absolute talia, sed imperfectius, quam alia generis ejusdem. Atque hoc modo posteriore Theologi dicunt justitiam secundum quid esse inter Deum et hominem, quia presupponit gratiam, et tamen simplificiter etiam dicunt esse justitiam, sed minus perfectam, quam ea sit, quae nullam gratiam prærequisit.

Quarto objiciunt, maximam esse inæqualitatem inter opera nostra, quamvis ex gratia profiscantur, et ipsam æternam beatitudinem; præsertim si beatitudo objective consideretur, sicut scriptum est: *Ego ero merces tua magna nimis.*

Respondeo: negari non potest, quia beatitudo longe excellat actioni meritoriae, cum in illa sit cognitio et charitas perfecta, in ista vero sit cognitio et charitas imperfecta: sed non requiritur absoluta æqualitas inter meritum et præmium, secundum justitiam distributivam, ut dici possit præmium deberi meritis ex condigno, etiam ex parte operis: sed sufficit, ut sit proportio quædam secundum quam is qui meretur dici possit dignus eo præmio. Nam hic etiam in terris, qui doctrina et bonis moribus prædictus est, et pro Ecclesia aliquamdiu laboravit, dignus Episcopatu judicari solet, quamvis absolute dignitas episcopalnis amplissima sit, et nullo pretio comparabilis: in rebus quoque naturalibus, dispositio ad formam multo imperfector est ipsa forma, et tamen ex naturali quædam justitia subjecto rite disposito forma debetur: sic igitur qui Deum ex toto corde diligat, ac per hoc mundus est corde, pacificus, mitis, humilis, misericors, dignus est, qui ad beatitudinem illam admittatur, quæ diligentibus Deum, mundis corde, pacificis, mitibus, misericordibus, humilibus, ut rite dispositis promissa est.

Quod autem dicebatur de beatitudine objectiva, quæ Deus est, non auget difficultatem, nam sicut Deus objectum est beatitudinis (id est) cognitionis et amoris beatorum; sic etiam objectum est meriti, id est, fidei et charitatis viatorum. Hoc solum interest, quod fides et charitas in hac vita minus perfecte Deum attingunt, quam visio et charitas in alia vita; sed ideo dicimus ex condigno fidei formatæ per charitatem deberi visionem cum ardentissima charitate, quia dignum est, ut res a Deo inchoata, et disposita

tandem aliquando perficiatur et absolvatur. Nam (ut loquitur S. Fulgentius in lib. I. ad Monimum cap. 10) « cum Deus vitam æternam donat, opus suum, quod inchoavit justificans impium, perficit, glorificans justum. »

Quinto objiciunt, Deum ex communi sententia Theologorum remunerare justorum opera supra condignum; proinde non esse in operibus justorum veram condignitatem ad præmium.

Respondeo: Deum remunerare supra condignum non ita esse accipendum, quasi bona opera non sint digna præmio vitæ æternæ; sed quod ultra præmium, quod ex condigno meriti bonis debetur, Deus ex liberalitate aliquid semper adjungat. Sed de hac re in sequenti capite disseremus.

#### CAPUT XIX.

*Deum remunerare opera bona supra condignum.*

Postrema restat quæstio, Num Deus opera bona remuneret ex mera liberalitate supra condignum. Communis enim Theologorum sententia id constanter affirmat, ut perspicuum est ex Sancto Thoma, sancto Bonaventura, Scoto, Durando et aliis in 4. sent. dist. 46.

Contrarium docuit Andreas Vega, in 5. quæst. de justificatione, et doctor ille Lovaniensis, cuius multas sententias Pius V. Pontifex damnavit. Est enim inter damnatas, sententias quarta decima his verbis expressa: « Opera bona justorum non accipient in die judicii extremi ampliorem mercedem, quam justo Dei judicio mereantur accipere ».

Probatur igitur breviter, Deum remunerare ultra vel supra condignum, primo, ex divinis litteris. Nam Matth. v. non sine causa Dominus ait: *Gaudete et exultate, quoniam merces vestra copiosa est in cœlis.* Et apertius Luc. vi. *Mensuram bonam, et confertam, et coagitatam, et supereffluentem dabunt in sinus vestros* (1). Certe enim justa merces esse poterat mensura bona; cur autem additur, conferta, coagitata, supereffluens, si nihil additur supra condignum?

Item Luc. xix. posteaquam servus fidelis qui lucratus fuerat decem mnas, acceperat

(1) Mat. V, 12; Luc. VI, 58.

præmium suum, id est, imperium supra decem civitates; rursus extraordinario munere datur ei mna, quæ fuerat ablata a servo infideli et pigro. Quid autem hoc significare potest, si Deus in judicio nulli dabit aliquid, nisi juste et ex condigno illud mereatur.

Adhæc, Matth. xx. in parabolâ vineæ, manifeste videmus multis dari integrum diurnum denarum, cum tamen non integrum diem in opere posuissent. Atque id non ex justitia, sed ex liberalitate factum esse, indicat Dominus illis verbis: *Volo huic dare, sicut et tibi. An non licet mihi quod volo facere? An oculus tuus nequam est, quia ego bonus sum?* Ex quo etiam intelligimus, id, quod supra condignum additur, non dari ex aequo, nec omnibus. Fortasse etiam hoc pertinet illud Apostoli ad Roman. VIII. *Non sunt condignæ passiones hujus temporis ad futuram gloriam, quæ revelabitur in nobis* (1), quamvis et aliter hoc testimonium exponi possit, ut supra notavimus.

Idem secundo, ex Patribus probari potest, S. Basilius, in Psalm. cxiv. in illud: *Convertere anima mea in requiem tuam*: « Proposita est, inquit, æterna requies his, qui legitime in hac vita decertarunt, quæ non secundum operum debitum ac meritum retrahuntur, sed juxta magnificentiam Dei his, qui in ipsum speraverunt, exhibetur. » Quem locum ostendimus cap. 6. male allegari contra merita ex condigno, cum non extenuet merita, sed amplificet munificantiam Dei in retrahendis præmiis etiam supra condignum.

S. Fulgentius in lib. I. ad Monimum cap. 10. reddens rationem eur vita æterna dicatur gratia, cum merces sit meriti, ita loquitur: « *Gratia autem etiam ipsa non injuste dicitur, quia non solum donis suis Deus dona sua reddit; sed quia tantum etiam ibi gratiae divinæ retributionis exuberat, ut incomparabiliter, atque ineffabiliter omne meritum, quantumvis bonæ, et ex Deo datae, humanæ voluntatis atque operationis excedat* ». Hæc ille. Itaque non temere, nec sine fundamento schole Theologorum præmium operibus bonis a Deo supra condignum reddendum esse confirmat.

Utrum autem operibus malis Deus poenam reddat citra condignum, non videtur ita esse certum, nec inveniuntur loca Scripturæ, quibus id facile confirmetur; et quamvis S.

Joannes Chrysostomus hom. 37. in Genes. hujus sententiae patronus esse videatur, tamen S. Augustinus lib. xxi. de Civ. Dei cap. 24. hanc ipsam sententiam tolerat potius, quam probat. Nam cum dixisset illa verba Psal. LXXVI. « *Numquid obliviscetur misericordiæ Deus, aut continebit in ira sua misericordias suas, non pertinere ad reprobos, sed ad electos, ita subjunxit* : « *Sed quibus placet, istam sententiam usque ad illa impiorum tormenta pretendere, saltem sic intelligent, ut manente in eis ira Dei quæ in æterno est prænunciata supplicio, non contineat Deus in hac ira sua miserationes suas et faciat eos non tanta, quanta digni sunt poenarum atrocitate cruciari* : non ut eas poenas vel numquam subeant, vel aliquando finiant, sed ut eas mitiores, quam merita sunt eorum, levioresque patiantur. Sic enim et ira Dei manebit, et in ipsa ira sua miserationes suas non continebit. Quod quidem non ideo confirmo, quia non resisto ». Hæc ille.

Quia tamen hæc sententia de poenis citra condignum, et multis Theologis placuit, et a sancto Augustino minime refutatur; respondendum erit quatuor testimoniis Scripturæ divinæ, que contra eam pugnare videntur.

Primum testimonium est illud: *Non existit inde, donec reddas novissimum quadratum* (2). Matth. v. Sed facilis est responsio. Nam, sive hic locus intelligatur de poenis purgatorii, ut nos in 1. lib. de purgatorio, et in 1. lib. de statu peccati ostendimus, sive etiam de poenis gehennæ, significat Dominus nullum peccatum sine suo cruciato mansurum, non autem nullam partem ejus cruciatus qui singulis peccatis debetur esse minuendam. Deinde loquitur Dominus de poena, quæ solvenda manebit post latam Judicis sententiam, non de ea, quam Judex constituet, cum sententiam feret. Quamvis enim Deus, cum peccatores judicabit, citra condignum fortasse judicabit; sed post sententiam latam nihil unquam de poena minuetur.

Alterum testimonium est Luc. vi. *Qua mensura mensi fueritis remetietur vobis* (3). Sed absque dubio sententia hæc generatim accipienda est, ut sensus sit, Qui boni fuerint, bona recipient; qui mali, mala; et qui valde boni fuerint, multum boni recipient; qui valde mali, multum mali. Nam si æqualitas præmii ad merita describeretur, repugnaret hæc sen-

(1) Rom. VIII, 18. — (2) Mat. V, 26. — (3) Luc. VI, 38.

tentia verbis illis, quæ ex eodem capite nos citavimus, mensuram bonam et confortam etc.

Tertium testimonium est Jac. ii. *judicium sine misericordia ei, qui non fecerit misericordiam* (1). Sed loquitur Apostolus eo loco de misericordia non quacumque sed salvante, atque a damnatione eterna hominem liberante. De qua loquitur Dominus Matth. v. *Beati misericordes, quoniam ipsi misericordiam consequentur* (2).

Postremum testimonium est in Apocalypsi cap. xviii. *Quantum se glorificavit, et in deliciis fuit, tanum date illi tormentum et luctum* (3). Cæterum hic locus docet proportionem quamdam futuram inter culpam et poenam, ut majori culpa major poena respondeat, et minori minori; non tamen necesse est ex hac proportione aequalitatem colligere. Sed de his satis, præsentim cum de suppliis citra condignum inferendis res sit (ut diximus) satis incerta.

#### CAPUT XX.

*Vitam æternam etiam quoad primum ejus gradum reddi meritum operum bonorum.*

Explicavimus tres partes disputationis de merito; sequitur quarta, quæ est etiam ultima, in qua brevissime docendum est, quænam sint illa, quæ cadunt sub merito de condigno.

Sunt autem omnino quinque res, quæ in dubium revocari possunt, vita æterna, gratia justificationis, gratiæ incrementum, reparatio post lapsum, et perseverantia in fide et charitate usque in finem. De quibus disputat S. Thomas in 1. 2. quest. 114. art. 5. et sequent. Nos paucis indieabimus, quæ veriora de his omnibus quæstionibus nobis esse videantur.

Primum igitur de vita æterna solum quæstio est, utrum ipsa vita æterna, an gradus tantum in ea præstantiores cadant sub merito de condigno. Sunt enim qui sentiant, vitam æternam, sive primum ejus gradum non cadere sub merito, cum debeatur jure hæreditatis omnibus filiis Dei, hoc ipso quod sunt filii Dei. Sunt etiam, qui existimant vitam æternam, sive primum ejus gradum, reddi meritum operum, si dilectio illa Dei, quæ est ultima dispositio ad justificationem, oria-

tur ex ipsa gratia justificationis, alioqui meritis non reddi.

Nos existimamus, vitam æternam, tum quoad primum gradum, tum quoad cæteros reddi bonis meritum filiorum Dei: nec multum ad rem facere, utrum ultima illa dispositio procedat ex gratia justificante, vel eam præcedat. Nam Scriptura divina passim docet, non solum gloriæ incrementum, sed ipsam gloriæ simpliciter præmian esse operum bonorum. Ut Matthæi xix. *Si vis ad vitam ingredi, serva mandata.* Et ibidem: *Qui reliquerit patrem, vel matrem etc., centuplum accipiet, et vitam æternam possidebit.* Et Jacob. i. *Beatus vir, qui suffert tentationem, quoniam cum probatus fuerit, accipiet coronam vite.* Gaat. vi. *Qui seminat in spiritu, de spiritu metet vitam æternam.* Et ad Colos. iii. ipsam hæreditatem scribit Apostolus, reddi operibus bonis; *Quodcumque facitis, ex animo operamini, sicut Deo, et non hominibus, scientes quod a Domino recipietis retributionem hæreditatis, Domino Christo servite* (4).

Ex quo intelligamus illum ipsum gradum gloriæ, qui debetur jure hæritario, retrubui etiam jure mercedis. Non enim est absurdum (ut supra non semel diximus) eamdem rem dupli jure deberi, titulo videlicet hæreditatis, et titulo meritorum. Atque hoc præstabunt in celo adulti infantibus, non solum quod illi ampliorem gloriæ obtinebunt, sed etiam quod ipsam gloriæ, et primum ejus gradum habebunt infantes solo jure hæreditatis, adultis vero gloria illa simul erit et patris hæritas, et corona victoriae.

Porro dispositio illa ultima, si gratiam adoptionis præcedat, non erit meritoria vita æternæ de condigno, quia non possunt mereri vitam æternam de condigno, nisi filii Dei, ut supra demonstratum est: si vero ex gratia illa nascatur, eamque sequatur, saltem ordinem naturæ, non poterit mereri primum gradum gloriæ, si vera sit illorum opinio, qui dicunt, non cadere sub merito id, quod jam debetur titulo hæreditatis: nam primum gradus gloriæ prius natura debetur titulo hæreditatis homini justificato quam ultima illa dispositio ex gratia justificationis procedat. Sicut enim prius est in homine gratia adoptionis, quam dispositio ex gratia ipsa procedat, ita prius est jus ad hæreditatem, quod

(1) Jacob. II, 43. — (2) Math. V, 7. — (3) Ap. XVIII, 7. — (4) Mat. XIX, 47; ibid. 29; Jacob. I, 12; Gal. VI, 8; Col. III, 23.

#### CAPUT XXII.

a gratia adoptionis separari nequit, quam ex gratia adoptionis dispositio illa procedat.

Vides igitur ad rem non facere, utrum illa dispositio gratiam præcedat, vel sequatur. Neuto enim modo meritoria esse potest primi gradus gloriæ, si quod jam debetur, non potest sub merito cadere. At si concedatur, quod nos contendimus, et quod S. Thomas docet, in 3. sentent. dist. 18. quæst. 4. art. 5. rem unam et eamdem variis titulis posse deberi; s. ne dubio ultima illa dispositio post infusionem gratiæ continuata meritoria erit vita æternæ, ut S. Thomas confirmat in 1. 2. quæst. 112. art. 2. ad 1.

#### CAPUT XXI.

*Non gratiam justificationis, sed ejus incrementum cadere sub merito de condigno.*

Jam vero de gratia justificationis, et ejus incremento, tota res brevissime expediti poterit. Nam gratiam ejusmodi non posse obtineri, neque ex condigno, neque ex congruo meritis operum, solis viribus liberi arbitrii effectorum, docuimus adversus Pelagianos, in lib. v, de gratia et libero arbitrio. Rursus, eamdem gratiam non posse obtineri ex condigno, sed solum ex congruo meritis operum ex fide, et auxilio Dei speciali procedentium, docuimus in lib. i. de justificatione cap. 21. Praeterea, non posse gratiam eamdem obtineri meritis consequentibus, hoc est, bono usu gratiæ, ut quidam olim absurde dixerunt, docet S. Augustinus in lib. II. contra duas epistolæ Pelagianorum cap. 7. et in lib. i. de prædestinat. Sanctorum cap. 12. quod illo argumento potissimum confirmatur: quia gratia justificationis sæpe datur illis, qui ea bene uti non possunt, ut infantibus mox a Baptismo morituris, vel qui non volunt, ut adultis quibusdam, qui gratiam jam acceptam abjiciunt, et sunt novissima eorum pejora prioribus, sæpe etiam non datur illis, qui ea bene usuri fuissent, si illam accepissent, quod de Tyriis et Sydoniis Dominus ipse testatur Matthæi xi.

Adhæc, nullum (Christo excepto) quamvis justam et sanctum posse aliis mereri gratiam de condigno, certa ratio persuadet. Nullum enim exstat pactum, nulla promissio de merito alienæ salutis; et solus Christus, ut Ecclesiæ

(4) Mat. IX, 2.

totius caruit, eam gratiam habuit, qua membris omnibus gratiam et gloriam mereretur: « Quamvis (inquit S. Leo in epist. 97. ad Leonem, cap. 2.) multorum Sanctorum in conspectu Domini pretiosa mors fuerit; nullius tamen insontis occisio, redemptio fuit mundi. Acceperunt justi, non dedere coronas, et de fortitudine fidelium exempla nata sunt patientiæ, non dona justitiæ ».

Sed siue certum est, non posse unum alteri ex condigno gratiam promereri, ita non dubium est, posse id ex congruo fieri. Quomodo S. Sthephanum precibus apud Deum conversionem Apostoli Pauli, et S. Monicam lachrymis apud eumdem conversionem S. Augustini promeruisse, nemo est qui negat. Et in ipso Evangelio legimus, Matthæi ix. *Videns Jesus fidem illorum dixit Paralyticum, Confide, fili, remittuntur tibi peccata tua* (1).

Denique posse hominem justum mereri ex condigno augmentum justitiae, docet Concilium Tridentinum sess. 6. can. 32. Docet etiam sanctus Augustinus, tract. 77. in Joannem, quamvis nomen ipsum de condigno non ponat: « Restat, inquit, ut intelligamus Spiritum sanctum habere, qui diligit, et habendo mereri, ut plus habeat, et plus habendo plus diligit ».

#### CAPUT XXII.

*Reparationem post lapsum, et perseverantiam usque in finem non cadere sub merito de condigno, sed solum de congruo.*

De reparatione post lapsum, et perseverantia usque in finem concors est sententia Theologorum, non cadere ea sub merito de condigno. Ac (et cætera argumenta preterea) si caderent illa duo sub merito de condigno, nemo justorum esset, qui non esset etiam de numero electorum et prædestinatiorum ad vitam. Qui error fuit Joviniani et Calvinii, et a nobis in tertio libro confutatus est.

Posse autem donum perseverantiae precibus impetrari, docuimus in II. lib. de gratia et libero arbitrio, cap. 12; posse vero reparationem post lapsum, eum qui justus est, mereri ex congruo, negat quidem sanctus Thomas, in 1. 2. quest. 114. art. 7. sed id-

ipsum concedere videtur in epist. ad Hebr. cap. vi. lect. 3. ut etiam aperte concedit S. Bonaventura, in 2. sentent. distinct. 28. explicans verba Petri Lombardi. Et certe non desunt optimae rationes, quibus id probari posse videatur. Nam in II. lib. Paralipom. cap. xix. dictum est ad Josaphat regem Juda: *Impio præbes auxilium et his qui oderunt Dominum, amicitia jungeris, et idcirco, iram Domini merebaris, sed bona opera inventa sunt in te etc.* (1) Ex quo intelligimus sanctum illum regem bonis operibus apud Deum obtinuisse, ut etiam cum peccaret, a Deo non desereretur, nec pro meritis puniretur. Item in Psal. LXX. orat Propheta, quod nos etiam orare convenit: *Cum defecerit virtus mea, ne derelinquas me.* Et certe frustra fieret talis oratio, si nulla ei respondere posset impretratio.

Adhæc, si potest justus mereri de congruo, id est, impetrare alteri conversionem, cur non et ipse sibi postulare et impetrare possit, ut si labatur non deseratur, sed ad pœnitentiam revocetur?

Præterea, potest homo nondum reconciliatus per opera pœnitentiæ impetrare et mereri ex congruo gratiam justificationis, ut in I. lib. demonstratum est, cur igitur non poterit idem ipse, dum est justus et amicus Dei impetrare et mereri ex congruo reparacionem, si forte labatur?

(1) II Par. XIX, 2. — (2) Psal. CLXX, 9.

Neque objectio illa convincit, per peccatum amittuntur omnia merita præcedentia, igitur fieri non potest, ut reparatio post lapsum bonis meritis ulla ratione reddatur. Nam probat quidem hoc argumentum, reparationem non posse esse mercedem, quæ sit reddenda ex justitia. Qui enim amisit omnia merita, quomodo potest ex justitia postulare mercedem? At non probat non esse congruens, ut Deus respiciat ex clementia sua ad bona opera præcedentia, et illorum intuitu misereatur ejus qui cecidit.

At (inquires) quo quis plura merita habuit, eo gravius Deum offendit, cum peccat. Quoniam merita nostra munera Dei sunt, et qui plura beneficia accepit, si benefactorem offendat, magis est ingratus, et minus dignus indulgentia. Respondeo: argumentum recte concludit adversus eos, qui ex malitia et contemptu benefactoris peccant; at non adversus eos, qui ex ignorantia et infirmitate delinquent. De quibus nos tantum loquimur. Quare sanctus Thomas in 2. 2. questione 186. artic. 10 docet, peccata religiosorum, etiam mortalia, sed ex ignorantia, vel infirmitate commissa minus, esse gravia, et facilius codonari, quam aliorum hominum, propter bona opera, quæ religiosi assidue faciunt.

FINIS SECUNDÆ CONTROVERSIE PARTICULARIS.

## DECIMÆ QUARTÆ CONTROVERSIE GENERALIS

DE

## REPARATIONE GRATIÆ

TERTIA ET ULTIMA CONTROVERSIA PRINCIPALIS

## DE BONIS OPERIBUS

IN PARTICULARI

QUINQUE LIBRIS EXPLICATA